

समे – 12:25 hrs.

<><><><><><>

NIA-Raids

आतंकवादी गतिविधिएं लेई रपेआ-पैसा उपलब्ध करोआने कन्नै जुड़े दे मामलें च जारी जांच दे इक हिस्से दे तौर उप्पर राश्ट्री जांच एजेंसी - एनआईए आसेआ अज्ज जम्मू च बक्ख-बक्ख थाहें पर छापे मारे जा'रदे न। छापेमारी आहली इस कारवाई दा मकसद, खिते च बन्ने पारा थमां जारी गतिविधिएं ते घुसपैठ गी शामिल नेटवर्क दा समूलचा नास करना ऐ। एनआईए नै एहदे शा पैहले बी आतंकवादी गतिविधिएं लेई रपेआ-पैसा उपलब्ध करोआने कन्नै जुड़े दे मामलें च जम्मू-कश्मीर च छापेमारी कीती ही। मेद ऐ जे इस अभियान कन्नै जम्मू-कश्मीर च आतंकवाद रोधी जतनें गी होर बल मिलोग। ऊ'आं इस बारै होर ब्यौरे गी अजें बलगेया जा'रदा ऐ।

<><><><><><>

Astronauts-Return

अंतरिक्ष जातरी नासा दे सुनीता विलियम्स ते बुच विलमौर होर अज्ज बड्डलै मूंह न्हरे स्पेस एक्स ड्रैगन दे अंतरिक्ष यान च धरती पुज्जी गए न। दवें अंतरिक्ष यात्री जून 2024 थमां अंतरराश्ट्री अंतरिक्ष स्टेशन च हे। एह 2 हफ्तें आस्तै उत्थे गए हे ते अंतरिक्ष यान थमां हिलियम दे रसाव ते रफ्तार च कमी कारण उनेंगी अंतरिक्ष स्टेशन पर 9 महीनें तोड़ी रूकना पेआ। राष्ट्रपति द्रौपदी मुर्मू होरें सुनीता विलियम ते बुच विल्मौर होरें'गी सुरक्षित

धरती उप्पर आहन्ने लेई नासा दी पूरी टीम गी मुबारकबाद दिती ऐ। सोशल मीडिरू दी इक पोस्ट च राष्ट्रपति होरें आखेआ जे सुनीता विलियम ते उन्दे साथियें बड़े मजबूत जज्बे, निष्ठा ते सब्र दा परिचय दिंदे होई हर कुसा गी प्रेरित कीता ऐ।

<><><><><><>

CS-PMDP

मुख्य सचिव अटल डुल्लू होरें बिजली विकास विभाग पर जोर पाया ऐ जे ओह प्रधानमंत्री विकास प्रोग्राम तैहत खड़े गेदे ढांचे दा उर्जा सरबन्धी ऑडिट करवा तां जे जम्मू-कश्मीर च उर्जा दी बण्ड सरबन्धी सुधारें च इनें परियोजनाएं दे असर दा आंकलन कीता जाई सकै। मुख्य सचिव होर बण्ड सरबन्धी सुधारें आहली कमेटी दी इक्क उच्ची सतह दी बैठका दौरान बोला'रदे हे, जेदा आयोजन प्रदेश दे बक्ख-बक्ख लाहके च इनें बड़ी परियोजनाएं दी अमल-आवरी दे कम्मै च हासल प्रगति दा आंकलन करने लेई कीता गेदा हा। मुख्य सचिव होरें आखेआ जे जम्मू-कश्मीर दी बिजली दी बण्ड आहली प्रणाली च लोड़चदे सुधारें लेई एह योजना बड़ियां महत्वपूर्ण न।

<><><><><><>

ACS-Education

अतिरिक्त मुख्य सचिव शांतमनु होरें कल एस.सी.ई.आर.टी दे जम्मू आहले डिवीजनल दफ्तरै च जादुई पिटारा नांs दी बशेश पैहलकदमी गी शुरू करोआया। राष्ट्री शिक्षा नीति 2020 दे मूजब, तैयार कीती गेदी इस नमें किस्मै दी पैहलकदमी दे तैहत बुनियादी शिक्षा

च बाददे दे मकसद कन्नै गल्लबात आहले बक्ख-बक्ख संसाधनें दी मदाद लैता जाहग। अतिरिक्त मुख सचिव होरें बच्चें दे भाषा कौशल ते सोच गी विकसित करने दे मकसद कन्नै कहानी सनाने सरबन्धी प्रोग्राम -सुनो कहानी पैहलकदमी गी बी शुरु करोआया। शांतमनु होरें रचनात्मक शिक्षा गी बढ़ावा देने ते बच्चें अंदर रचनात्मक सोच विकसित करने लेई एस.सी.ई.आर.टी जम्मू देजतनें दी सराहना कीती।

<><><><><><>

JK-BOSE SA

जम्मू-कश्मीर स्कूली शिक्षा बोर्ड आसेआ आयुष्मान भारत योजना दे तैहत निबंध लेखन ओहले इक्क मुकाबले दा आयोजन करवाया गेआ जेदे च छेमी जमात थमां लेइयै 12मीं तोड़ी दे बच्चें हिस्सा लैता। किशोरावस्था शिक्षा कार्यक्रम ते स्कूली सेहत ते आरोग्य प्रोग्राम ज्नेह विशें पर आधारित इस मुकाबले लेई कुल 399 एंट्रियां हासल होइयां जिंदा माहिरें आसेआ विश्लेषण कीता गेआ।

<><><><><><>

Udh. Arms

उधमपुर दियें डिप्टी कमिशनर सलोनी राय होरें जिले च विजन वैद्य लसेंसें दे कम्म करा'रदे थेआरें दे डीलरें दी स्थिति दा इक्क बैठका दौरान जायजा लैता। बैठक दौरान डिप्टी कमिशनर होरें थेआरें सरबन्धी गैर अधिकृत कम्म-कारवाइयें पर फौरी रोक लाने दी जरूरता पर जोर पाया। उनें सब्भनें तहसीलदारें गी हुक्म रसाल कीता जे ओह सरबन्धत डीलरें गी नोटिस जारी

करिये उन्दे लसेंस दी वैद्यता बारे ब्योरे हासल करन। उने अधिकारिये गी आखेआ जे ओह इस गल्ला गी यकीनी बनान जे जिले च गलत ढंगे कन्ने थेआरे सरबन्धी कोई लैन-देन नेई होऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्ने बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतिये सुनी सकदे ओ।

<><><><><><>

Shah-CRPF Day

गृह मंत्री अमित शाह होरें केंद्री रिजर्व पुलस बल दे सब्भनैं अधिकारियें ते जवानें गी अज्ज सी.आर.पी.एफ दिवस 2025 पर शुभकामनां दितियां न। सोशल मीडिया दी इक पोस्ट च गृह मंत्री होरें आखेआ ऐ जे अज्जै दे ध्याड़े सन 1950 च बल गी प्रेजिडेंट्स कलर कन्नै सम्मानित कीता गेआ हा। उन्नैं आखेआ जे सी.आर.पी.एफ दी दलेरी ते बलिदान औने आहली पीढ़ियें गी सदा प्रेरित करदा रौहग। श्री शाह होरें देसा लेई सर्वोच्च बलिदान देने आहले दलेर जवानें गी नमन कीता।

<><><><><><>